

**Uunga siunnersuut: Unammilleqatigiinneq pillugu Inatsisartut inatsisaat nr. xx, xx.
2014-imeersoq (unammilleqatigiinnermut inatsit)
(Inuussutissarsiornermut Aatsitassarsiornermullu Naalakkersuisoq)**

pillugu

Inuussutissarsiornermut Ataatsimiititaliap

ISUMALIUTISSIISUTAA

Siunnersuutip aappassaaneerpeqarneranut saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Knud Kristiansen (A) siulittaasoq

Inatsisartunut ilaasortaq Ruth Heilmann (S) siulittaasup tullia

Inatsisartunut ilaasortaq Karl Lyberth (S)

Inatsisartunut ilaasortaq Andreas Uldum (D)

Inatsisartunut ilaasortaq Aqqaluaq B. Egede (IA)

Siullermeerinerup kingorna ataatsimiititaliap siunnersuut misissorpaa isumaliutigisanilu matumuuna inatsisartunut saqqummiullugit.

1. Siunnersuutip imaa siunertaalu

Unammilleqatigiinnermik pituttorsimanngitsumik, naapertuilluartumik sunniuteqarluartumillu qulakkeerinissaq siunnersuummi pingaarnertut anguniarneqarpoq. Suliniutit iliuitsillu unammilleqatigiinnermut akimmisaarisussatut siunertaqartut sapinngisamik annertunerpaamik eqqorneqarnissaat siunertaralugu inatsisissatut siunnersuut oqaasertalersorneqarpoq.

Suliffeqarfiit niuerfimmeereersut akornanni unammilleqatigiinnerup siuarsarniarneqarnissaa aammalu suliffeqarfinnut nutaanut kiffaangissuseqartumik niuerfimmiinnermi unammilleqatigiinnissap qulakkeerneqarnissaa siunnersuutip ilaatigut siunertaraa. Tamanna inatsisissatut siunnersuummi aalajangersakkat arlallit unammilleqatigiinnermik qulakkeerinissamut nukittorsaanissamullu apeqqutinik qitiusunik imaqartut aqqutigalugit pissaq, tassunga ilaatigut ilanngullugit:

Pineqaatissiisarnermut aalajangersakkanik sukannernerulersitsineq, taamaalilluni unammilleqatigiinneq pillugu inatsimmik annertuumik unioqqutitsisoqartillugu pineqaatissinneqarsimasunut inissiisarfimmiittussanngortitsilluni

eqqartuussisoqarsinnaalerluni. Tamatumani ilaatigut peqatigiipilulluni ingerlataqarnerup aningaasaqarnikkut pinerluutitut allatulli isigineqalernissaa siunniunneqarluni.

Kattunnernik nakkutilliineq, suliffeqarfiit kattunnerat niuerfimmi sunniuteqarluartumik unammilleqatigiinnissamik annertuumik akimmisaartitsilissasoq naliliisoqarpat Unammilleqatigiinnermut ataatsimiititaliaq kattuttoqarnissamik itigartitsisinnaavoq.

Nassuiaatinik tamanut saqqummiussineq, tassunga ilanngullugit suliassaqaqfinni misissuinerit aamma, assersuutigalugu akinut iluanaarutinullu pissutsinik sanilliussilluni tulleriissaartumik aaqqissuussaasumik misissuinerit. Taamaaliortoqarpoq innuttaasut unammilleqatigiinnermi pissutsit atuuttut pillugit annertunerusumik ilisimasaqalersinniarlugit.

Unammilleqatigiinnermik killilersuisumik isumaqatigiissuteqarnissamut il.il. inerteqquteqarneq. Tamanna inatsimmi qitiusumik suliassaqaqfiuvoq aammalu unammilleqatigiinnermik killilersuisumik isumaqatigiissuteqarnissamut, akit pillugit isumaqatigiissuteqarnissamut il.il. inatsisissatut siunnersuut manna siusinnerusukkutulli inerteqqusiivoq. Unammilleqatigiinnermik killilersuisumik isumaqatigiissutit inerteqqutaasut inatsimmi tamakkiisumik allaaserineqanngillat. Taamaaliornikkut Unammilleqatigiinnermut ataatsimiititaliap unammilleqatigiinnermik killilersuisumik isumaqatigiissuteqarnernut ullumikkut ilisimaneqanngitsunut siunissami akuliunnissamut aqutsinikkullu iliuuseqarnissamut periarfissaqarnissaa qulakkeerneqarpoq.

Pissaaneqarnerusumik inissisimanermik atonerluinissamut inerteqquteqarneq. Suliffeqarfiit Kalaallit Nunaanni niuerfimmi imaluunniit taassuma ilaani pissaaneqarnerusumik inissisimanerminnik atonerluinissaannik inerteqquteqarnermik siunnersuut suli imaqarpoq.

Unammilleqatigiinnermik equititsisumik pisortat tapersiissuteqarnissaannik ataatsimut isigalugu maannakkut inatsimmi inerteqquteqarneq atuutsiinnarneqarpoq. Unammilleqatigiinnermut ataatsimiititaliap unammilleqatigiinnermut ajoqutaasumik pisortat ingerlatsinerannut akuliunnissaanut killiliinissaanullu periarfissai inatsisissatut siunnersuutikkut annertunerulersinneqassapput. Pisortat inuussutissarsiornermik suliaqarnerat inatsimmi tunngaveqartoq inerteqquteqarnermut aalajangersakkami pineqartumi ilaatinneqanngilaq.

2. Siunnersuutip Inatsisartuni siullermeerneqarnera

Siunnersuutip piviusunngortinneqarnissaa Inatsisartunit annertuumik tapersersorneqartoq ataatsimiititaliamit maluginiarneqarpoq. Inatsisartut taamatut oqariartuuteqarnerat ataatsimiititaliamit tusaatissatut tiguneqarpoq, taamaattumillu isumaliutissiisummi matumani siunnersuummut annikitsuinnarnik oqaaseqaateqarniarluni.

3. Tusarniaanermut akissutit

Siunnersuut piffissami 23. december 2014 – 20. januar 2014-imi makkununga tusarniaassutigineqarpoq:

Siulittaasup Naalakkersuisoqarfia, Aningaasaqarnermut Nunamullu Namminermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqutariinnermut Inatsisinillu Atuutsitsinermut Naalakkersuisoqarfik, Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoqarfik, Ineqarnermut Naalakkersuisoqarfik, Kalaallit Nunaanni Politimesteri, Kalaallit Nunaanni Sulisitsisut Peqatigiiffiat, Grønlandske Advokater, Grønlands Revisionskontor, Deloitte, KPMG, BDO, Kalaallit Nunaanni Atuisartunut Pisisartunullu Siunnersuisoqatigiit, Unammilleqatigiinnermut ataatsimiititaliaq, GrønlandsBANKEN, KANUKOKA, NUSUKA, Greenland Business og Bank Nordik.

Tusarniaanermut akissutit makkunanit tiguneqarput:

Aningaasaqarnermut Nunamullu Namminermut Naalakkersuisoqarfik, Kommune Kujalleq, Qeqqata Kommunua, Grønlands Banken, Kalaallit Nunaanni Sulisitsisut Peqatigiiffiat, Nusuka, Grønlandske Advokater, Transparency Greenland.

3.1 Ataatsimiititaliap tusarniaanermut oqaaseqaatai

Piffissaq tusarniaaffiusoq eqqarsaatigalugu ataatsimiititaliaq isumaqarpoq juullip ukiortaallu nalaanni qaamat ataaseq sivisugisassaanngitsoq. Siunissami tusarniaanissani nalliuttut piffissallu sulinngiffeqarfissat eqqumaffiginiarneqartassasut Inuussutissarsiornermut Ataatsimiititaliamit kaammattuutigineqarpoq, taamaalluni pisuni taamaattuni piffissaq tusarniaaffiusoq sivitsorlugu illuatungeriit tusarniarfigisat, pingaartumik illuatungeriit tusarniarfigisat namminersortut tusarniaanermut akissuteqarnissaminni piffissaqarluarsinnaqqullugit. Tamatuma saniatigut tusarniaanermut allanik oqaaseqaateqarnissamut ataatsimiititaliaq tunngavissaqarsorinngilaq.

4. Ataatsimiititaliap siunnersuummik suliarinninnera

Inatsisissatut siunnersuutip matuma siullermeerneqarnerani paasineqartutut siunnersuutip siuarsarneqartariaqarnera annertuumik isumaqatigineqarpoq. Inatsisartut siunnersuummut tapersersuinerat tamanna ataatsimiititaliamit tusaatissatut tiguneqarpoq. Taamaattorli

siunnersuutip siullermeerneqarnerani oqaaseqaatit ilaat ataasiakkaat isummerfiginissaannut ataatsimiititaliaq tunngavissaqarsorivoq.

Unammilleqatigiinneq pillugu inatsisip (inatsisissatut siunnersuut una) akuersissutigineqarnera Atuisartunut Pisisartunullu Siunnersuisoqatigiit il.il. atorunnaarsinneqarnerannik kinguneqassasoq oqaatigineqarpoq. Unammilleqatigiinneq pillugu inatsisip akuerineqarnera taamatut kinguneqassanngilaq. Tuniniaanissamik nittarsaassisarneq aamma nalunaaqutsersuisarneq pillugit inatsimmi (tuniniaanissamik nittarsaassisarnermut inatsit, imm. 124) Atuisartut Pisisartullu Siunnersuisoqatigiivisa il.il. atorunnaarsinneqarnerannik kinguneqartumik allaffissornikkut iluarsartuussinissaq siunniunneqarpoq. Taama naatsumik oqaaseqaateqarluni Inuussutissarsiornermut Ataatsimiititaliap siunnersuummik suliarinninnini naammassiniarpaa.


5. Siunnersuutip aningaasaqarnikkut kingunerisassai

Siunnersuutip akuerineqarneratigut aningaasaqarnikkut kingunerisassat killeqartut siunnersuummut nalinginnaasumik nassuiaatini oqaatigineqarpoq. Tunngavissat pigineqartut tunngavigalugit allatut naliliinissamat ataatsimiititaliaq pissutissaqarsorinngilaq. Taamaalilluni Naalakkersuisut apeqqut tamanna sukumiisumik misissorsimassagaat aammalu malitsigisaanik aningaasaqarnikkut kinguneqassanngitsoq ataatsimiititaliamit tutsuigineqarpoq. Siunnersuut pisortat karsiinut naatsorsuutigisat akerlianik aningaasartuutaqqissagaluarpat aningaasartuutit taakku aningaasaliissutaareersut iluini akilerneqarsinnaassapput, taamaattoqassappallu suliniutinik allanik tunulliussisoqartariaqarneranik kinguneqassalluni.

6. Ataatsimiititaliap inassuteqaatai

Ataatsimiititaliap isumaqatigiittup siunnersuut akuerineqassasoq inassutigaa.

Taama oqaaseqarluni isumaliutissiissummilu oqaatigineqartutut paasinnilluni
ataatsimiititaliap siunnersuut aappassaaniigassanngortippaa.




Knud Kristiansen

Siulittaasoq



Ruth Heilmann


Siulittaasup tullia



Karl Lyberth



Andreas Uldum



Aqqaluaq B. Egede